



# basic education

Department:  
Basic Education  
**REPUBLIC OF SOUTH AFRICA**

## **NATIONAL SENIOR CERTIFICATE**

**IGREYIDI 12**

**ISINDEBELE ILIMI LEKHAYA (HL)**

**IPHEPHA LOKUTHOMA (P1)**

**NOVEMBA 2023**

**IMITLOMELLO: 70**

**ISIKHATHI: Ama-iri ama-2**

**Iphepheli linamakhasi ali-14.**

**YELELA**

1. Iphepheli LINEENGABA EZINTATHU: ISIGABA A, B kanye NESIGABA C.  

|            |   |      |
|------------|---|------|
| ISIGABA A: | Ukufunda nokuzwisisa                          | (30) |
| ISIGABA B: | Ukurhunyeza                                   | (10) |
| ISIGABA C: | Izakhi nemithetjhwana yokusetjenziswa kwelimi | (30) |
2. Funda YOKE imiyalo ngokuyelela.
3. Phendula YOKE imibuzo.
4. Thoma isigaba ESINYE NESINYE ekhasini ELITJHA.
5. Thalela ngemva kokuphendula imibuzo YESIGABA NGASINYE.
6. Tlola iinomboro zeempendulo zakho zifane patsi nangendlela ezinonjorwe ngayo epepheni lemibuzo.
7. Tjhiya umuda OWODWA ngemva kwaleyo naleyo pendulo.
8. Yelega kobana upeleda amagama ngendlela efaneleko bewutlole nemitjho ezwakalako.
9. Isikhathi esiphakanyisweko sokutlola isigaba ngasinye:  

|            |                      |  |
|------------|----------------------|--|
| ISIGABA A: | Pheze imizuzu ema-50 |  |
| ISIGABA B: | Pheze imizuzu ema-30 |  |
| ISIGABA C: | Pheze imizuzu ema-40 |  |
10. Tlola kuhle nangesandla esibonakalako.

**ISIGABA A: UKUFUNDA NOKUZWISISA****UMBUZO 1**

Phendula imibuzo engaphasi kwetheksthi eku-1.1 nengaphasi kwesithombe esiku-1.2.

1.1 Funda itheksthi engenzasi uyizwisise bese uphendula imibuzo elandelako.

**ITHEKSTHI A****UKUPHEPHA EENKOLWENI ZENARHA YESEWULA AFRIKA**

- |   |  |          |
|---|--|----------|
| 1 | Ukuphepha eenkolweni livikeleko elifanele libe khona ngaso soke isikhathi ukwenzela bona woke umuntu ozifumana asemabaleni wesikolo, okufaka hlangana umntwana, utitjhere nesisebenzi esingasingutitjhere amaphilwabo angabi sengozini. Ababelethi batjhaphulula iinhliziyi zabo nabathumela abentwababo ngeenkolweni ngombana bayazi bona babathumela eendaweni eziphephileko. Umbuzo omkhulu gothi; 'Ingabe zoke iinkolo ziphephile na?'   | 5        |
| 2 | Ngokuya kwethiyori ebizwa ngokobana yi- <i>Maslow's Hierarchy of Needs</i> , ukuphepha kusifuneko esisisekelo epilweni yomuntu nekufanele sihlangatjezwe ngaphambi kobana kungenziwa ezinye izinto ekuhlangenwe ngazo eendaweni ezihlukahlukene. Neenkolweni kulindeleke bona kube njalo, ngaphambi kobana abafundi bathome ukufunda, kufanele bazizwe baphephile. Ukuphepha kwabafundi ngeenkolweni kuqakatheke khulu ngombana kunomthelela omuhle efundweni yabo. Kokuthoma, kwenza bona abafundi bakhuthalele ukuya eenkolweni ngombana bayazi bona baya endaweni lapha bavikeleke khona. Kwesibili, ukuphepha ngeenkolweni kusiza abafundi nabotitjhere bona bafunde bebefundise ngokutjhaphuluka nangokuthaba bese lokho kwenza kube lula bona abafundi baphumelele eemfundweni zabo. | 10<br>15 |
| 3 | UmNyango wezeFundo esiSekelo wenza ngakho koke okusemandleni wawo ukuqinisekisa bona iinkolo ziba ziindawo eziphephileko ngombana yoke into eyenzeka eenkolweni ithinta amaphilo wabafundi nabotitjhere bunqophu. UmNyango lo uthoma ngokuqinisekisa bona iinkolo ziyakantjelwa bezibe namasango alodlhelwako. Lokhu ukwenzela bona kube nelawulo lawo woke umuntu ongenako nophumako bekutjhejwe nezinto ekungenwa nekuphunywa nazo emabaleni wesikolo. Emasangweni wesikolo kuba nabonogada abamukela abafundi nabangenako ekuseni ngomnqopho wokuqinisekisa bona abangeni nezinto eziyingozi ezifana neendakamizwa nofana iinkhali.   | 20<br>25 |

|   |  |          |
|---|--|----------|
| 4 | Okhunye okwenziwa mNyango wezeFundo esiSekelo ukuqinisekisa ukuphepha ngeenkolweni kusebenzisana nomNyango wezokuPhepha nokuVikeleka ngokobana kesinye nesinye isikolo kuba namapholisa asilusako ukwenzela ukulwisana nobulelesi obungahle bube khona esikolweneso. Kezinye iinkhathi amapholisa la avele atheleke kungakalindelwa azokusetjha boke abafundi. Umnqopho wejimeli kusuke kukuqinisekisa bona abafundi balahla umukghwa wokungena eenkolweni nezinto ezifana neendakamizwa neenkhal ezisuke zibe yingozi emaphilweni wabanye abafundi nakibotitjhere.  | 30<br>35 |
| 5 | Ngaphandle komzamo owenziwa mNyango wezeFundo esiSekelo ukuqinisekisa bona abafundi bayaphepha ngeenkolweni, abotitjhere nabo kufanele babe nendima abayidlalako. Bafanele baqinisekise bona abafundi bayahloniphana ukwenzela bona kungabi nommoya wokulwa hlangana nabo. Kufanele baqinisekise nokobana ngeenkumbeni zokufundela kuhlala kuhlwengekile ukuze abafundi bahlale baphilile ngaso soke isikhathi, kungabi namalwele abatheleleka ngawo. Okhunye kukobana baqinisekise bona abafundi bayalawuleka ngeenkumbeni zokufundela ukwenzela bona bakghone ukubonelela ukuphepha komunye nomunye umfundi ngekumbeni leyo.   | 40<br>45 |
| 6 | Indima edlawa mKhandlu oLawula isiKolo ekuqinisekiseni ukuphepha ngeenkolweni kukwenza isiqiniseko sokobana iindlwana zokuzithuma ziba sebujaameni obulungele ukusetjenziswa, azinabungozi ebafundini nakibotitjhere njengokuthi zibe nemigodi evulekileko nengenza bona bawele ngaphakathi. Okhunye okwenziwa mkhandlu lo kuqinisekisa bona iindlwanezi zihlala zihlwengekile ngaso soke isikhathi. Esinye nesinye isikolo ngokusizana nomKhandlu oLawula isiKolweso kufanele sithathe amagadango aqinileko ekulwisaneni nomukghwa wokubhenywa kweendakamizwa ngeendlwaneni zokuzithuma ngombana abafundi ababhemako ababeki amaphilo wabo kwaphela engozini kodwana balimaza newabanye abafundi. | 50<br>55 |
| 7 | Ukudla okuphekelwa abafundi nalokho okuthengiswa ngeenkolweni kuyakuthinta ukuphepha kwabo. Ngomnyaka wee-2021 enyangeni kaNtaka kesinye seenkolo zeTshwane, eWinterveld, kwaba nabafundi abama-203 abagulela esikolweni ngebanga lokudla ukudla okunetjhefu. Ngalokho-ke umKhandlu oLawula isiKolo kufanele uqinisekise bona abantu abaqatjhelwa ukuphekela abafundi nalabo abavunyelwe ukuthengisa ukudla ngeenkolweni kuba babelethi abanabantwana abafunda esikolweneso ukuze batjheje indaba yokuphepha kwabentwababo.  | 60<br>65 |
| 8 | Okhunye okwenziwako kuqinisekisa bona isikolo siba nekamurwana elisetjenziselwa ukunikela abafundi abagulako itjhejo ukuze bangaguleli hlangana nabanye. Nanyana kunjalo, umNyango wezamaPhilo uyelelisa bona labo abagulela eenkolweni banganikelwa imitjhoga. Kunalokho kuthintwe ababelethi nofana abathogomeli babo msinyana ukuze bafunyanelwe isizo elirhabako.  | 70       |

|    |  |              |
|----|--|--------------|
| 9  | Imidlalo edlalwa bafundi ngeenkolweni efana nomdlalo webholo erarhwako, ibholo yezandla nokugijima abafundi abazibandakanya kiyo ivamise ukuba yingozi lokha abotitjhere nabanganikeli abafundi itjhejo ngeenkhati zokuzibandula. Kufanele abafundi babe ngaphasi kwetjhejo labotitjhere nabaya ematatawini bayozibandula nalokha nabayokudlala imidlalo le nezinye iinkolo. | 75<br><br>80 |
| 10 | UmNyango weFundo esiSekelo ukhuthaza woke umphakathi weSewula Afrika ukobana uthathele indaba yokuphepha eenkolweni ehloko, kungabi msebenzi wabotitjhere nomNyango lo kwaphela ngombana kuthatha isitjhaba soke ukukhulisa umntwana.  |              |




[Ithethwe ku-inthanethe yatjhugululelwa esiNdebeleni]

- 1.1.1 Ngaphandle kwabentwana besikolo nabotitjhere tlola omunye umuntu naye otlhoga ivikeleko esikolweni njengokutjho kwesigaba soku-1 setheksthi engehla le. (1)
- 1.1.2 Tlola ibizo lethiyori eqalelele ukuphepha kwabantu eendaweni abahlanganela kizo ekhulunyiswa esigabeni sesi-2 setheksthi engehla le. (1)
- 1.1.3 Tlola imithelela emihle EMIBILI ekuthiwa ingalethwa kulokha abafundi nabaphephileko eenkolweni abafunda kizo ngokutjho kwesigaba sesi-2 setheksthi engehla le. (2)
- 1.1.4 Rhunyeza iindlela EZIMBILI ekuthiwa zenziwa mNyango wezeFundo esiSekelo ukuqinisekisa bona iinkolo ziba ziindawo eziphephileko ngokutjho kwesigaba sesi-3 nsesi-4 zetheksthi engehla le. (2)
- 1.1.5 Ngokutjho kwesigaba sesi-6 setheksthi engehla le kuthiwa ngikuphi okufanele kwenziwe mKhandlu oLawula isiKolo ukuqinisekisa bona iindlwana zokuzithuma zihlala ziphephile ngaso soke isikhathi? Ipendulwakho ayibe maphuzu AMABILI. (2)
- 1.1.6 Kanengi amapholisa navane aphume ijima lokuyokusetjha eenkolweni avame ukukhamba nezinja. Ucabanga bona kusuke kuyini isizathu salokho? Ipendulwakho ayibe liphuzu ELILODWA. (2)
- 1.1.7 Ucabanga bona iinkhali neendakamizwa ezivamise ukutholwa mapholisa ebafundini lokha nakabasetjhako zisuke zingene njani emasangweni wesikolo esinabonogada abakhandela bona izinto ezinjengalezo zingangeni? Ipendulwakho ayibe maphuzu AMABILI. (2)
- 1.1.8 Hlathulula ngephuzu ELILODWA okungaba mnqopho womNyango wezamaPhilo wokuyelelisa abotitjhere bona abafundi abagulela eenkolweni banganikelwa imitjhoga, kunalokho bababizele ababelethi babo. Ipendulwakho ayibe liphuzu ELILODWA. (2)

- 1.1.9 Phendula isitatimende esingenzasi ngoLIQINISO nofana AKUSILO IQINISO bese usekela ipendulwakho ngephuzu ELILODWA.  
Boke abotitjhere badlala indimabo yokuba babelethi besibili babentwana ababafundisako ngeenkolweni. (2)
- 1.1.10 Tshwaya ngelihlo elibukhali ipumelelo yokwenzeka kwalokhu okutjhiwo sitatimende esithi; 'kuthatha isitjhaba soke ukukhulisa umntwana' emiphakathini yenarha le. Ipendulwakho ayibe liphuzu ELILODWA. (2)
- 1.1.11 Coca ngendima engadlalwa mbelethi ukuqinisekisa bona umntwanakhe uyaphepha lokha nakazibandakanya emidlalweni ehlukahlukeneko edlalwa esikolweni afunda kiso. Ipendulwakho ayibe liphuzu ELILODWA. (2)

1.2 Qalisisa iinthombe ezingenzasi bese uphendula imibuzo elandelako.

**ITHEKSTHI B**

|   |  |
|---|--|
| <p><b>ISITHOMBE 1</b></p>    | <p><b>ISITHOMBE 2</b></p>  |
| <p><b>ISITHOMBE 3</b></p>  <p style="text-align: right; font-size: small;">[Zithethwe ku-<a href="http://www.images.com">www.images.com</a>]</p> |  |

1.2.1 Tlola isikhali ESISODWA ekuthiwa asingeni esikolweni kezivezwe esithombeni soku-1. (1)

1.2.2 Rhunyeza ngephuzu ELILODWA okubonakala kusenzeka esithombeni sesi-2 kezingehlezi. (1)

- 1.2.3 Hlathulula ubujamo obubonakala esithombeni sesi-3 obungenza bona abafundaba bangafundi ngepumelelo. Ipendulwakho ayibe maphuzu AMABILI. (2)
- 1.2.4 Ngokuyelela ubujamo obubonakala esithombeni sesi-3 kezingehla, ucabanga bona ngikuphi okungenziwa zizakhamuzi ukuqinisekisa bona abentwababo bafundela ngaphakathi kweenkumba eziphephileko ngeenkolweni? Ipendulwakho ayibe liphuzu ELILODWA. (2)
- 1.2.5 Nasiyelela okutjiwo sigaba sesi-4 setheksthi eku-1.1 nalokho okwenzeka esithombeni sesi-2 setheksthi eku-1.2, kuyabonakala bona uRhulumende uyalinga bona iinkolo zibe ziindawo eziphephileko kodwana akakufikeleli ngokwaneleko lokho. Ucabanga bona ngiyiphi indima engadlalwa mbelethi ngamunye ukusizana noRhulumende ekufikeleleni umnqopho wejimeleli ngokupheleleko? Ipendulwakho ayibe liphuzu ELILODWA. (2)
- 1.2.6 Ngokwazi kwakho ingabe ibhorodo ebonakala esithombeni soku-1 iyazisiza nofana ayizisizi iinkolo ukuqinisekisa bona akungenwa nezinto eziyingozi emabaleni wazo? Sekela ipendulwakho ngephuzu ELILODWA. (2)

**IMITLOMELO YESIGABA A: 30**



**ISIGABA B: UKURHUNYEZA****UMBUZO 2**

Fundisisa itheksthi engenzasi uyizwisise bese uyirhunyeza ngokwemiyalo onikelwe yona.

**IMIYALO:**

1. Ngamagama angadluli kwama-70, rhunyeza ngendima uveze **izinto ekufanele uzitjheje nawukhetha ibizelo.**
2. Rhunyeza ngendima eyodwa emumethe amaphuzu alikhomba.
3. Ungabuyeleli utlole isihloko setheksthi.
4. Tlola inani lamagama owasebenzisileko ekupheleni kwesirhunyezo sakho.

**ITHEKSTHI C****IZINTO EKUFANELE UZITJHEJE NAWUKHETHA IBIZELO**

Akukholweki bona kwakhe kwaba nesikhathi lapha umuntu wayengazikhetheli ibizelo alifunako bekufike lapha azifumana sele enza umsebenzi othileko angawuthandiko epilwenakhe. Isizathu salokho kwakukukobana abantu bebakateleleka ukusebenza nanyana kungimuphi umsebenzi ukuze bakghone ukuzondla bona nemindenabo. Koke lokho sekwatjhuguluka ngombana esikhathini sanje ukukhetha ibizelo sekuqakatheke pheze ukudlula yoke into umuntu angayicabanga epilweni. Nawukhetha ibizelo kunezinto ekufanele uzitjheje khulu.

Khetha ibizelo olithanda ngehliziywakho yoke nonetjisakalo ngalo. Ngokwenza njalo uzokukghona ukubekezelela zoke iintjhijilo ozokuhlangabezana nazo emkhakheni oyokusebenza kiwo. Yenza irhubhululo elimayelana nebizelo olifunako ukwenzela bona ukghone ukulizwisisa ngokungeneleleko. Ilwazi ozolifumana nawenza irhubhululweli lizokwenza bona ube nesiqiniseko sokobana mbala uyalithanda ibizelwelo na. Abanye abantu nabenza irhubhululo elinjengalelo bavame ukuvakatjhela iindawo zomsebenzi omayelana nebizelwelo.

Qinisekisa bona ibizelo olikhethako linamathuba amanengi womsebenzi nasele ufumene iziqu zalo. Lokhu kuzokusiza ngokobana ukghone ukuba nalapha ungabalekela khona nakungenzeka ungafumani umsebenzi webizelo lelo. Zazi bona umumuntu onjani ukuze ukhethe ibizelo elikhambelana nobunjalo bakho. Lokho kungaba nomthelela omuhle epilwenakho ngombana uzabe wenza umsebenzi owuthandako nokhambelana nobunjalo bakho. Khetha ibizelo elizokubhadela imali ehle nezokwanelisa iimfuneko zakho, zomndenakho kanye nezinga lepilo ofuna ukuyiphila. Akusimnandi ukusebenza kodwana ungakghoni ukuzenzela izinto ozithandako.

Ukuphepha kwepilwakho kuqakathekile, njeke qinisekisa bona ukhetha ibizelo eliphephileko nengeze lafaka ipilwakho engozini. Nawenze njalo uzokusebenza utjhaphulukile.

Funisisa bona akhona amabubulo anikela ngesizo lezeemali lokha nawuyokufundela ibizelo olifunako emazikweni aPhakemeko wezeFundo. Isizo leemali zokufunda ongalifumana lifaka hlangana imifundaze nemali yokufunda ongayiboleka emabulungelweni wezeemali. Tjheja bona ibizelo olithandakweli lithatha isikhathi esingangani ukulifundela. Abanye abantu bagcina sele balisa iimfundo zabo phakathi ngebanga lobude besikhathi sokufundela ibizelo abalikhethileko ukuze baragele phambili ngamanye wamabhudangwabo.

Into yokugcina ongeze wathanda bona yenzeke epilwenakho kuzifumana wone imali, isikhathi namandlakho ukufundela ibizelo ongeze wazuza litho ngalo. Njeke kuqakathekile bona ulandele iyeleliso ezivezwe ngehla.

[Ikhutjhwe ku-inthanethe yatjhugululelwa eLimini lesiNdebele]

**IMITLOMELO YESIGABA B:**


**10**

**ISIGABA C: IZAKHI NEMITHETJHWANA YOKUSETJENZISWA KWELIMI****UMBUZO 3: ISIKHANGISO**

Qalisisa isikhangiso esingenzasi bese uphendula imibuzo elandelako.

**ITHEKSTHI D****SIYATHUMBA *RUNNING CLOTHING***

**YIBA YIKUTANI KEZOKUGIJIMA! ZIFUMANELE AMANYATHELO WOKUGIJIMA  
NGENTENGO KATHATHA MI! RHABA UZIZELE MATHUBHA UNGADISELWA  
ZIINYAWO!**



1. Ukuthenga ngesikolodo akukavumeleki.
2. Kuthengiselwa abanamakarada kwaphela.
3. Kuthengiselwa abantu abaphethe ubufakazi bokobana babagijimi bamaphaliswano kwaphela.

[Sithethwe ku-[www.images.com](http://www.images.com)]

3.1 Tlola imikhiqizo EMIBILI ekhangiswe esikhangisweni esingehlesi. (2)

3.2 Dzubhula amagama asetjenziswe esikhangisweni esingehlesi angakwenza bona ubhalelwe kuthenga imikhiqizo engehla le nanyana imali unayo begodu unebhudango lokuba mgijimi. (1)

3.3 Khetha ipendulo enembako kezingenzasi.

Yoke imibandela esetjenziswe esikhangisweni esingehlesi iveza ilimi ...

- A lokudlelezela.
- B lokwenzisa.
- C lokurogela.
- D lokubandlulula.

(1)

- 3.4 Hlathulula isizathu sokutlolwa kwamagama athi; '*Running Clothing*' butjhigama asetjenziswe esikhangisweni esingehlesi. (2)
- 3.5 Ingabe imikhiqizo ekhangiswe esikhangisweni esingehlesi iyakhambelana nofana ayikhambelani neensetjenziswa zabagijimi? Sekela isiqu nto osithathako ngephuzu ELILODWA. (2)
- 3.6 Dzubhula igama lokubolekwa elisetjenziswe esikhangisweni esingehlesi. (1)
- 3.7 Thatha amagama asisitjho athi; 'ukudiselwa ziinyawo' asetjenziswe esikhangisweni esingehlesi uzakhele ngawo umutjho kuzwakale bona uyayazi ihlathululo yaso. (1)
- [10]**

#### UMBUZO 4: IKHATHUNI

Qalisisa ikhathuni engenzasi bese uphendula imibuzo elandelako.

#### ITHEKSTHI E

**Tjheja:** Isithombesi sithethwe ngesikhathi se-*Load shedding*.



[Ithethwe ku-[www.cartoons.com](http://www.cartoons.com)]

- 4.1 Tlola iinsetjenziswa EZIMBILI ezibonakala ekhathunini engehla ezibufakazi bona mbala abantwaba baqinyelwe igezi. (2)

- 4.2 Ngaphandle kokobana abantu abasekhathunini engehla bararwa sisehlakalo sokucinyelwa igezi qobe lilanga, ngikuphi okhunye godu okubararako? (1)
- 4.3 Hlathulula ubungozi obungabangwa sisetjenziswa esiphethwe ngumma osekhathunini engehla le nange kwenzeka asitjihiye sisodwa sikhanya. Ipendulwakho ayibe liphuzu ELILODWA. (1)
- 4.4 Ucabanga bona ngikuphi okhunye ebegade kungenziwa babantu abavezwe ekhathunini engehla le ukujamiselela igezi ehlala icinywa nangathana bebababantu abasebenzako? Ipendulwakho ayibe liphuzu ELILODWA. (2)
- 4.5 Iphephandaba elisekhathunini engehla le liveza bona igezi izokukhuphuka godu. Ngokubona kwakho ingabe lokhu kuzowuthinta njani umndeni ovezwe ekhathunini engehla le? Ipendulwakho ayibe liphuzu ELILODWA. (2)
- 4.6 Tlola isirhunyezo segama elithalelweko emutjhwani olandelako.  
Kosikazi, imalikazi engaka esiyibhadelako kodwana asinagezi? (1)
- 4.7 Thatha igama elithi, 'inyanga' wakhe ngalo umutjho liveze umqondo wesandiso sendawo/undaweni. (1)

**[10]****UMBUZO 5**

Funda itheksthi engenzasi uyizwisise bese uphendula imibuzo elandelako.

**ITHEKSTHI F**

Nawehla iimbundu yeentaba zeSithlagwana, uza ngeStobela uvama ukuphoseka kwaSkhosana nawumuntu otjhejako. Umuzi wakwaSkhosana ubonakala msinya ngombana uhlala umhlophe twa ngomgwalo. USkhosana bekathethe abafazi ababili, uNaNtuli noNaBhuda. KuNaNtuli khona, bekathethe ikutani yomfazi ngombana bekakhuthele. UNaNtuli naye ngokwakhe bekatjho bona umfazi ende naye endodeni eyodwa semumuntu wekosi. 5

UNaNtuli lo nguye obeletha izibulo lekhayapha, uBangani, ongazwani nokusebenza budisi. UBangani lo, ngitjho nanyana sele indlu yakwabo yotjani inethela bengeze angena ihlathana ayokufuna utjani bokuyilungisa. Kunalokho, bekakhetha ukuphosela imigodla emidala phezulu, apethe ngokobana athi; 'Lisa kunjalo, ngizakubona mhlana ngithola isikhathi.' Angatjho njalo uqedile. Uthi anjalo nje batjho ufuna ukuba ngusomabhezini. Ukusuka lapho, umtjele ngokobana akhulume ngezemsebenzini be kangakhuluma imini yoke. Baqinisile abadala nabathi; 'Indlu yegagu iyanethela'. Bekunjalo-ke nakuBangani ngombana be kangawuvali umlomo ngeendaba zemsebenzini nanyana asekhaya. Inengi labangani bakhe besele **bamazi** bona umumuntu onjani. Babebabona nokobana into eyayimenza ahlalele ukuphatha zemsebenzini nakasekhaya, kukobana wayefuna isikhundla. 10

[Ithethwe ku-*Uzangenzani*]

- 5.1 Dzubhula igama elisibaluli emutjhwani olandelako.  
Umuzi wakwaSkhosana ubonakala msinya ngombana uhlala umhlophe twa ngomgwalo. (1)
- 5.2 Tlola bona igama elithalelweko emutjhwani ongenzasi lo limumethe umhlobo bani wesabizwana.  
UNaNtuli lo nguyey obeletha izibulo lekhayapha, uBangani. (1)
- 5.3 Buyelela utlole umutjho ongenzasi lo bese ujamiselela ibinzana lamagama athalelweko kiwo ngegama ELILODWA.  
UNaNtuli naye ngokwakhe bekatjho bona umfazi ende naye endodeni eyodwa semumuntu wekosi. (1)
- 5.4 Tlola bona isilungelelo esithalelweko egameni elisetjenziswe emutjhwani ongenzasi ngesamhlobo bani wepambosi.  
Bekakhetha ukuphosela imigodla emidala phezulu. (1)
- 5.5 Buyelela utlole umutjho ongenzasi uveze umqondo wesikhathi esisaragela phambili nokwenzeka.  
Ukhuluma khulu ngeendaba zeemsebenzini nanyana asekhaya. (1)
- 5.6 Ngokuyelela imiThetho nemiThetjhwana yokuTlola nokuPeledwa kweLimi lesiNdebele, buyelela utlole umutjho ongenzasi lo kodwana ulungise okungakalungi egameni elithalelweko kiwo.  
Bengeze angena ihlathana ayokufuna utjani. (1)
- 5.7 Buyelela utlole umutjho ongenzasi uveze ukulandula.  
Ukhuluma ajame ngeenyawo. (2)
- 5.8 Thatha amagama asisaga asetjenziswe etheksthini engehla uzakhele ngawo umutjho kuzwakale bona uyayazi ihlathululo yaso. (2)

**[10]**

**IMITLOMELO YESIGABA C: 30**  
**INANI LOKE: 70**